

BILTEN

ANNA LINDH FONDACIJA BOSANSKOHERCEGOVAČKE MREŽE

Broj 6

decembar 2023. –
januar 2024.



Dragi prijatelji/ce,

Pred vama je šesti broj Informatora bosanskohercegovačke Mreže Anna Lindh Fondacije. (decembar 2023. - januar 2024.)

U njemu se nalaze informacije o aktivnostima članica ALF BiH, informacije koje dobijamo od Sekretarijata ALF, pozivi za aktivnosti, projekte, partnerstva itd..

Informator za sada izlazi na bosanskom-srpskom-hrvatskom jeziku.

Ukoliko želite podijeliti informacije o vašim aktivnostima za naredne brojeve informatora, možete ih slati na: orcuzla@bih.net.ba

Uživajte u čitanju!

U OVOM BROJU:

- Godišnji sastanak ALF šefova mreža - Istanbul, Turska 13. - 15. 12.2023.
- **Sastanak članica ALF Mreže Slovenija, Ljubljana, 23. januar 2024.**
- PCRC SARAJEVO - poziv za prijave: Festival MIRA '24
- Sarajevo susret kultura - "Ratne ljubavi"
- DIS TEATAR BANJA LUKA - Program Festivala Wave
- UG Topeer Doboj - akcije čišćenja
- Mostarski teatar mladih - 'SLOBODNI MOSTAR' Predstava po romanu Dragana Markovine



Godišnji sastanak ALF šefova mreža - Istanbul, Turska 13. - 15. 12.2023.

Fondacija Anna Lindh održala je svoj sastanak šefova mreža u Istanbulu, u Turskoj, a domaćin je bila ALF mreža iz Turske.

Dvodnevni sastanak okupio je čelnike mreža civilnog društva i predstavnike iz 28 euro-mediterranskih zemalja u prostor koji im omogućava da podijele svoja razmišljanja i ideje iz zemalja u kojima se nalaze.

Sastanak je započeo govorom predsjednice Fondacije Anna Lindh, Njenog kraljevskog veličanstva, princeze Rym Ali, nakon čega su uslijedila dva šefa ALF mreže civilnog društva, dr. Gurkan Akcaer i Necdet Saglam, kao i gospodin Murat Şen, zamjenik generalnog direktora za odnose sa EU Ministarstva vanjskih poslova Turske.



“Ovaj sastanak je jedini forum na kojem i danas imamo mogućnost da okupimo sve za jednim stolom u ovom posebno razarajućem vremenu za cijeli naš region, a posebno za bliskoistočni dio u okviru našeg Euro-Med regiona. Mislim da je vrijedno zastati i razmisliti šta to znači,

odgovornost koju svi nosimo kao rezultat i potencijal da pomognemo u promociji dijaloga u trenutku kada se čini da je dijalog najdalje od onoga što vidimo na terenu”, rekla je predsjednica Fondacije Anna Lindh, Nj.KV princeza Rym Ali u svom uvodnom govoru na početku sastanka šefa mreže.



Sastanak je završen snažnom posvećenošću povećanju saradnje na ključnim principima djelovanja kao što su mladi, umjetna inteligencija i zajednički život. ALF cijeni ove prilike da čuje od svojih mreža i stekne vrijedne uvide o predstojećim programima i aktivnostima dok se priprema za upečatljivu godinu koja je pred nama.

Bosanskohercegovačku mrežu ALF predstavljao je Miralem Tursinović, koordinator ALF-a.

Sastanak članica ALF Mreže Slovenija, Ljubljana, 23. januar 2024.

U Ljubljani, Slovenija je, 23. januara 2024. godine, u organizaciji glavne kancelarije Slovenačke mreže ALF - Zavoda "POVOD" Ptuj, održan godišnji sastanak članova ALF Slovenija. Sastanku je prisustvovao i **Miralem Tursinović** - koordinator ALF BiH. Tokom sastanka su se članovi ALF Slovenija upoznali sa aktivnostima Bosanskohercegovačke ALF Mreže, te smo razgovarali o mogućem razvoju i pravcima saradnje između BiH i slovenačkih organizacija. Jedna od tema, ali i mogućnosti saradnje bio je i predstojeći poziv "ALF in motion", saradnja i razmjene među organizacijama članicama ALF iz Evrope i Mediterana.



PCRC SARAJEVO

POZIV ZA PRIJAVE: Festival MIRA '24


Centar za postkonfliktna istraživanja i Balkan Diskurs pozivaju mlade ljude iz Bosne i Hercegovine na učešće u trećem Festivalu Mira u Vitezu od 22. do 26. februara 2024. godine.

Festival Mira je jedinstvena inicijativa Centra za postkonfliktna istraživanja koja ima za cilj osnaživanje aktivnog angažmana i učešća mladih i lokalnih zajednica u procesu izgradnje mira u Bosni i Hercegovini kroz saradnju na umjetničkim projektima, aktivnostima i radionicama posvećenim transformaciji sukoba i društvenom pomirenju. Dio atmosfere sa prošlogodišnjeg festivala možete pogledati na: <https://balkandiskurs.com/2024/01/23/festival-mira-24/>

Ovogodišnji Festival Mira donosi niz sadržaja za mlade, uključujući muzičke koncerte, teatarske predstave, izložbe fotografija, umjetničke radionice, projekcije dokumentarnih filmova i promocije različitih mirovnih sadržaja domaćih i međunarodnih organizacija. Festival se organizuje u okviru kompleksa etno sela Čardaci u Vitezu, na obali rijeke Lašve.

Od izabranih učesnika se očekuje prisustvo tokom svih dana Festivala. Troškovi prevoza, smještaja i hrane će biti obezbjeđeni od strane organizatora. Ukoliko ste zainteresovani za učešće, popunite obrazac koji možete pronaći [ovdje](#) i pošaljite ga na events.pcrc@gmail.com.

Rok za prijave na Festival je 12. februar 2024. godine.



Sarajevo susret kultura - "Ratne ljubavi"

Projekt „Ratne ljubavi“ koncipiran je kao projekt koji putem kulture i različitih umjetničkih izraza, prikazuje ratno Sarajevo kroz ljubav i slobodu parova koji su ovjekovječili svoju ljubav tijekom rata u razdoblju od 1992. do 1995. godine.

U Sarajevu, koncerti, izložbe, predstave i filmovi, bili su duhovna hrana koja je građanima odvlačila misli od svakodnevnih strahota i stvarala pozitivan ambijent u kojem su se sretali, družili i zaljublivali.

Na hiljade ljudi u periodu od 1992. do 1995. godine stavilo je ruku na srce i izrecitovalo ljubavnu himnu „da“, odvaživši se poći u nepoznato i zajedno se suočavati sa nadolazećim olujama očekujući dugu poslije kiše.

I nakon toliko godina, rado se prisjećamo tih lijepih trenutaka koji su nam promijenili emocije u ratu, kada smo u nesreći nalazili sreću, dijelili strah i neizvjesnost, litru vode, cigaru, toplu ciglu ispod jorgana, leće, grah, makarone, konzerve, „lanč“ pakete i tabasco. Dijelili smo ljubav.

Hrabri brakovi u Sarajevu su bili inspiracija za mnoge tekstove, opjevane pjesme, napisane knjige, neispričane priče koje ćemo opet doživjeti na vašoj izložbi. Ovo je prilika da i vaša ljubav i hrabra priča bude ispričana i pretvorena u izložbu, obilježena muzikom tog doba. Vjerujemo da je svaka priča drugačija i posebna, i da će obogatiti kolekciju priča koja slavi moć ljubavi.

Vaše priče*, kao i skenirane fotografije iz perioda '92. -'95. možete poslati putem email-a na adresu info@smoc.ba do 15.02. 2023, kako biste učestvovali na veličanstvenoj izložbi i manifestaciji u maju 2024. godine! Raduje nas što imamo priliku čuti vašu priču!

Ovu priliku koristimo da se zahvalimo zastupnici u Skupštini Kantona Sarajevo prof.dr. Sanela Klarić na inicijativi i Ministarstvu kulture i sporta Kantona Sarajevo na podršci. Udruženje „Sarajevo susret kultura“ se raduje implementaciji ovog projekta i sa nestrpljenjem očekuje vaše priče i fotografije.

*Prateći tekst uz fotografiju koji nam dostavljate ne bi trebao biti duži od 700 karaktera.

[#profdrsanelaklaric](#) [#vladaKS](#) [#ministarstvokultureisporta](#)



DIS TEATAR BANJA LUKA - Festival Wave

Banja Luka 15-17. januar 2024. podnaslov Festivala: Snaga žene

PROGRAM:

Ponedjeljak, 15. januar 2024. u 18:30

Svečano otvaranje Festivala

Ponedjeljak, 15. januar 2024. u 19:00*"Komedija za odrastanje"*

Produkcija: Dis- teatar Banja Luka

Opis: Burleska, predstava koja govori o iskustvu dvije žene iz pozorišta, njihovom viđenju svijeta i odnosa prema društvu i obrnuto.

Utorak, 16. januar 2024. u 13:00*"(O)Sveti(i) bes"*

Produkcija: Višegrad (neformalna grupa Wave projekta)

Opis: Predstava koja interpretira poznatu pjesmu Marčela, naglašavajući odlučnost mladih žena za promjenom društvenih paradigmi.

Utorak, 16. januar 2024. u 17:00*"Adamovo rebro"*

Produkcija: Kakanj (Dramska grupa JU CZK Kakanj)

Opis: Dirljiva predstava koja ističe položaj žena u društvu, istražujući njihovu snagu i ulogu kao nositeljke promjena kroz emotivne priče

Utorak, 16. januar 2024. u 19:00*"Ispočetka"*

Produkcija: Nevesinje /Trebinje (neformalna grupa Wave projekta uz podršku Centra za kulturu Nevesinje)

Opis: Emotivna predstava koja simbolizira početak novog poglavlja za žene, potičući ih da preispitaju društvene norme i ostvare pozitivne promjene.

Srijeda, 17. januar 2024. u 13:00*"Uzdah"*

Produkcija: Kostajnica (neformalna grupa Wave projekta)

Opis: Inspirativna predstava koja kroz primijenjeno pozorište istražuje teme rodne nejednakosti i nasilja nad ženama, osnažujući mlade glumice kroz katarzično iskustvo.

Srijeda, 17. januar 2024. u 17:00*"Krik"*

Produkcija: Ljubuški/Mostar (neformalna grupa Wave projekta)

Opis: Interaktivna, plejbek predstava koja kroz emotivne priče otkriva unutarnje glasove žena suočenih s društvenim nepravdama i neshvaćanjem.

Svaka od ovih predstava ima svoju jedinstvenu priču koja istražuje različite aspekte ženskog iskustva, naglašavajući snagu i složenost uloge žena u društvu, te su sve nastale u okviru projekta Wave, koji je finansiran: PROGRAMOM MALIH GRANTOVA ZA OSNAŽIVANJE ŽENA, AMERIČKE AMBASADA SARAJEVO, BOSNA I HERCEGOVINA

Ulaz na sve predstave je besplatan



UG Topeer Doboј - akcije čišćenja

Mladi iz Doboja, Maglaja i Žepča su organizovali akcije u svojim lokalnim zajednicama.

U Doboju smo očistili parking u centru grada pored kog je smještena Zelena pijaca, gdje smo uredili površinu na kojoj se nalazio otpad od papira, kartonskih kutija, plastike... iako je kontejner postavljen u tom dijelu parkinga. Na ovaj način smo odlučili vlastitim primjerom ukazati na važnost čiste i zdrave životne sredine. Brinuti za svoj grad je jedan od početnih koraka učešća u svojoj lokalnoj zajednici i doprinos društvenom radu.



U Žepču smo razgovarali i učili o javnom zagovaranju i volonterizmu. Volonteri Crvenog križa svoje znanje su prenijeli mladim volonterima u svojoj lokalnoj zajednici i važnosti ove teme.

Na akcijama su učestvovali mladi iz Doboja, Maglaja, Žepča. Svojim primjerom pokazali su jedinstvenost mladih snaga koji žele određene promjene.

Naše aktivnosti podržane su kroz projekat „Jačanje povjerenja i kohezije u zajednicama u Bosni i Hercegovini“ koji finansira Služba za instrumente vanjske politike (#FPI) Evropske unije u okviru Instrumenta za susjedstvo, razvoj i međunarodnu saradnju (#NDICI), a zajedno provode [Evropska unija u Bosni i Hercegovini](#), [United Nations in BiH](#), [OSCE Mission to Bosnia and Herzegovina](#) i [Vijeće Evrope - Ured u Sarajevu](#).

[BiH Može Bolje](#)

[#MožemoBolje](#)



Finansira
Evropska unija



Mostarski teatar mladih - 'SLOBODNI MOSTAR' Predstava po romanu Dragana Markovine



Pedeseti rođendan Mostarski teatar mladih obilježit će premijerom predstave radnog naziva "Slobodni Mostar", autora Zlatka Pakovića, a prema motivima romana "14. februar" Dragana Markovine.

Predstava u koprodukciji ovog teatra i Narodnog i Pozorišta lutaka Mostar, premijerno će se igrati u veljači, a ekipa već radi na pripremi.

Sliku Mostara unutar 24 sata tog četrnaestog dana veljače 1945, donose glumci triju ustanova kulture iz ovog grada. Igraju stvarne likove različitih ideoloških opredjeljenja, baveći se i s tim kako su oni doživjeli taj dan. Oko 14. veljače danas je mnogo kontraverzi, pa autor smatra da je predstava kao i roman, važna za dalji suživot u gradu na Neretvi.

Nadam se da će biti predstava značajna za budućnost ovog grada i da će se u njoj možda moći ogledati ta budućnost. To je cilj, rekao je Paković, s kojim je složan i prvi čovjek MTM-a, Sead Đulić.



Nama se to učinilo zanimljivim, jer je taj datum dosta problematičan u ovom vremenu. Dosta se oko toga polemizira, priznaje ili ne priznaje. Ovo bi trebala jedna predstava koja će otvoriti sva ta pitanja, ali i ukazati kako dalje, naveo je.

Kazališne kuće su za uloge u predstavi predložile najbolje glumce iz svojih ansambala.

Ideja romana, pa i predstave je ruka pomirenja kroz sagledavanje povijesnih činjenica. Predstava je ustvari fikcija na temelju stvarnih događaja i ljudi iz svih ideologija.